

## Titus

<sup>1</sup> Paulo, na Anutu wane qelit ñei so Yesu Kristo wane Aposolo, na matok nange paki, biranangi sarikole, yemo Anutuño ñei ñerep magukoune matok onge, yewa eñane mali malip qesiñkawe ma togolekei wane, so iwen onbe don wele Anutu wane numa don eaño kito ebonge, yewa wane kine detlukkei. <sup>2</sup> Ea wane kutno simileño gege togon warañkaki sariake, Anutu eñe isiine midaineño mokaka naso qei bano kiek kiekino, gege iwa ea biñek qe ñebonge. <sup>3</sup> Eso nasoine motke, yewao eñine don kisi yewa ra qelañange, donine yewa ea nañane kutno motke, eso noño Anutu ma mena menañze, eñane añaine teweke more, don kisiine yewa ra qelañanbe sua ari-maïke.

<sup>4</sup> Titus na kibi qe ginmaïle, ge giponne welekatne, ñere mali malipse weku pamaïke.

Anutu Magak so Kristo Yesu erane mena menañjo wet menañ so peam maine giniake.

### *Titusño Krete Siao Urata Make*

<sup>5</sup> Na Krete siao bira gangole gemaine, yemo urata natne mi mamaine, pamaïke yewa mauluke more, numaino mot warekenane, so matko matko doku tau tau magu eñane ware ware biraone arikenane biragane sarikole. Nañane don numa golale sikan gangole, ea mo detluk waremaine. <sup>6</sup> Ware ware bira kaikene, ñei yewa eñe sotine midaine, eñe ñanomine weku, so dokoine eñe mali malip korop, so wetneño zuba

wet mi mageake, me aṅa bira wiraine midaine, yaline biraonikene. <sup>7</sup> Eṅe Anutu wane urata wareka okanmaike, doku tau tau magu, yewa eṅane ware ware yewa eṅe sotine midaine. Eṅe wawaine misuk okaniake, me sot osi osi misuk okaniake, me doku togole zok misuk ne geke, me kawali misuk qeake, me wesi aboṅ wane bailalaṅ misuk okaniake. <sup>8</sup> Eṅe ṅei mat maneo ṅine sariu kima ebu more mauluk oniake, so eṅe tanik manik maine ea wane simile kayake. Eṅe dereret mayakatne yewaka mogasiake, eṅe gegeine koboboine geki paki, Anutu wane tanik manik yewa mogare ariake, so eṅe wetinane sawe geake. <sup>9</sup> Eṅe Anutu wane miti don kito manbi paki, numaine ma togole mangoi, yewa togogle malipka okorayake. Numa yaleoken okangi paki, eṅe maine eweke more ṅei natne don wele yewaṅo wetene ma togoleake. Paki ṅei natne don wele qe ṅabaka okanmami, eṅane sotene yalewaka sikan ongi kau ebu kesiake.

### *Krete Siao Isi ṅei Loutne Gekoi*

<sup>10</sup> Yewao, ṅei loutne eṅe ṅabaine okanbi paki, ṅei natne don wele midaine rara so isienerop gemami, so Yuda ṅei natne wetneṅ eṅano ṅine doku taukoi, edo yale okanmami. <sup>11</sup> ṅei yaline eṅane aṅaene ma wonge more donene ma walukkene, onoka wane, ṅei yaline eṅe wesi aboṅ maiki wane rau paki, masi tanik gamuinerop mi oka okane, yewa okane more, ṅei korop enṅene so rem qiekopene matali one more kito ebonmami. <sup>12</sup> Krete ṅei enṅeno ṅine propet, ṅei wet dereret suaine mane, oṅo iwa yale rake, “Krete

nei eje isiene matkine, osom zubaine borikine, so eje n̄ara n̄at qeqe neu paki, tabon̄ geqe.” <sup>13</sup> Eso eje don yewa rake yemo wele, kine yalinane ge don togoleka edane ra wetonikene, pakiso, eje mali malipene libeka maine ma gekei. <sup>14</sup> Paki eje Yuda nei en̄ane don kine kine wele midaine, yewa kiroine misuk malipka gekei, so nei natne kepe iwa wane ramatok don mogare gemami, eje miti don wele n̄adek kakoi, en̄ane Yuda wane ra matok don yewa misuk desikei. <sup>15</sup> Nei kotoene libeka gemami, en̄ano kine kine korop libeka n̄oka pamaike, n̄o borikineño maki kotoene sigileke so mali malipene midaine okangoi, en̄ano kine kine mane libekaka mi pamaike, onoka wane, en̄ane dereretene so kotoene mo korop sigilewareke, ea wane. <sup>16</sup> Ene pieneño raikēi, “Nene Anutu wane kine detmaine,” yale ra okane mamaeneño yemo bisop onmaike, eje mado madoñine so don qeqe, eje urata kine kine maine, yewa mane mama wane rokop midakaka.

## 2

### *Nei Nerep Suaine En̄ane Don*

<sup>1</sup> No goño yemo koboboine geqe, yewano doku tau tau magu wele, ea wane don edane kito ebonikene. <sup>2</sup> Edannom, nei suaine eje doku togole mi nene, ea wane sawe titiinerop gekei, so dereretene warekau, mayakatneka payake. Ene mali malipene payake, ea wane rokopko wet maep korop gekei paki, umat kine kine wakongi, eje mi pelekei, eje togogole okorakei. <sup>3</sup> Rokop yalewaka edannom, nerep suaine eje nerep wele

gegeene koboboine gekei, paki ene kisi qequeene midaine gekei, me doku togole wain misuk ne gekei, so ea wane qelit qeque okanikei, ene nei nrep natne kine kine maine yewaka kito edanikei. <sup>4</sup> Edane more nrep sikanonbi, ene naoekopene so medewekopene wet maep okanonikei. <sup>5</sup> Ene wet dereretene warekau mayakatneka paki, gegeene libeka payake, so ene matene ma suatke warekau mayakatneka paki, naoekopene so medewekopene kito qesin ebuwi paki, naoekopene anaene tewekkei, yale okanbi, nei ene Anutu wane don mi qikkaikei.

#### *Nei Qaluwit Ene Don*

<sup>6</sup> Rokop yalewaka nei qebin onnom, ene dereretene masuluke warekaikei. <sup>7</sup> Paki, ge gonjom tanik manik kine kine korop mayakatneka okan warekene, nei ene kau paki, yewaka mogare okanikei, Miti don mauluke more urataine mam paki kito edanikene. <sup>8</sup> Don maineka ra edanikene paki, nei ene don qotkoine mane misuk raikiei, don yewano nabakopone qomene kitopoke gamuo biraongi, ene nenane don mane qotkoine mi mageu paki raikiei.

#### *Qelit Mama Ene Don*

<sup>9</sup> Qelit mama ene ware ware kopene ene anaene tewekeu paki, urata kine kine korop maineka mawareu, ware ware kopene ene detpi menageake, ene donine turuine misuk maingekei. <sup>10</sup> Me enano nine kobu kine kine mane misuk maikiei, kobu maikiei wane turuine yemo ene naso banem maineka okanikei so bororom gekei. Yale okanbi, ene tanik manik mayakatne

okane maine yewaŋo tebakaki, Anutu ŋenane Mapi Mapitze, eŋane don kito ŋidan okanmaine, eŋane eŋet binjek ma wieake.

*Nene Libeka Ge More Kristo Wane Naso Yewa Tomakaikene*

<sup>11</sup> Anutuŋo ŋei ŋerep korop menaŋgenane raki paki, ŋebu sese ŋoniakane numa mo ma wakonge.

<sup>12</sup> Sese ŋonge, yewaŋo kito ŋedanmaike, yemo ŋene gege borikine so kepe wane masi tanik qotkoine, yewa qeliŋka warekene, paki, ŋene detluke more numa koboboine gesoke ari, Anutu wane masi tanik yewa mogare kepe iwa wane kutno naso iwao gekene. <sup>13</sup> Naso suaine

mosopinerop kaikenane wetke tomaka gemaine, ŋenane Suaine Anutu so Mapi Mapikze Yesu Kristo wane qeli ewe zonom baŋ wakoniake.

<sup>14</sup> Eŋe ŋenane raki paki, gegeine qikka ŋebonge, borikine kine kine korop yewao ŋine makok ŋongi paki, ŋebuki ŋei ŋerep libe qe more eŋine bonepine okane eweke more masi tanik maineka okanŋenane, yale okanŋonge.

<sup>15</sup> Don ea korop kito edanikene, paki donŋone togogoleka edane ma togole onikene, so donŋone desikei, yewa ra wetonikene. Qeliŋ onnom eŋano ŋine maneŋo ge misuk yuangane geu ket biraganiake.

### 3

*Asu Wanonjine Wako Wakon Musele Wakongone*

<sup>1</sup> Ge ŋei ŋerep magukopŋone don qe wirike eŋane ware ware so ŋei waom eweene kitou paki,

anɔene teweke more kine kine maine yewaka eweke okanikei. <sup>2</sup> Edannom, enje ɛei mane don ɔotkoine misuk olasikei. Mida. Enje ɛei peamine so kima kima gekei. Paki naso banem ɛei korop enane kaitko wet peserop bororom gege yewa sikanonikei. <sup>3</sup> Nene ɛedom atak mane wet qelan okane, anɔ bira wira okangone paki, sot korop okangone. Nene yale okanem paki, bailalan kine kine ea wane qelit qe qe okane more, qomze qiseki solazane simileka detkone. Nene gegeze korop dere worik so wetɛo ɛei natne enane abon kine kineenane bailalan oka okan, ɛei enje ɛene ɛaba ɛonbi, ɛene enje ɛaba onjem, yewa wano matali onwarekone. <sup>4</sup> No Anutu ɛenane Mapi Mapikze enane kima kima so wet maepɛo yemo ɛenano lotkeke. <sup>5</sup> Enje ɛene ɛebu seseɛone enino biranonge, yemo ɛene ɛedom koboboine ge more, urata mane maine makonane midakaka, ɛo yemo enine qomine rarainane ɛebu seseɛone saukɛongi, Asu Koboboineɛo wako wakon musele so gege musele ɛebonge. <sup>6</sup> Anutuɛo Yesu Kristo ɛenane Mapi Mapikze onjo ɛebu more enino biranonge, enane raki paki, Asu Koboboine zok manerop qe watɛonge. <sup>7</sup> Enine qomine raraine ɛene biranongi, Anuturop koboboine ge more sari gege togon wane biɛek okane, ea wane dereret gekenane, yale okanonge.

### *Don Wele Midaine Nadekaikene*

<sup>8</sup> Don iwa yemo welekatne, ge sorin borin okane, don yewa korop togoleka ra edanikene, paki ɛei Anutu malipka okanmami, enje maine

togole okora wetene iwaoka more, urata wele korop maine maikai, so ea okanbi, nei n̄rep korop mauluk on okanmaike. <sup>9</sup> N̄o qelan̄ don wane āa sorā au au, n̄osa n̄abo en̄ane en̄et tego kiroroin̄e mit mit sorin̄ nagu sorin̄ nagu, so Israel wane Rara Togon don wane kawali qēqe, yewa yemo ge n̄adek kaikene, yewa yemo mi oka okane so wele midaine. <sup>10</sup> Nei manen̄o qepok mapok okangi, ge girem don atak weku me etke olatnom mi detkiso, yemo girem don koso manerop misuk olasikene, qelin̄ kanom en̄ineka geake. <sup>11</sup> Ge detmaine, nei yaline en̄e numa mo qeyauke, eso en̄ane borikineine mo qe wakonmaike, yemo en̄e sot korop.

### *Don Qoiqoine*

<sup>12</sup> Na talekawe Artemis me Tikikusn̄o gen̄ano uyakeo, ge mayakatne Nikopolis yewao sari marat nanikene, onoka wane na koya naso mat yewao gekalane ramaile. <sup>13</sup> Ge masuluke more rara togon don wane kine dereret nei, Zenas so Apolos ere arikeik wane, qesin̄ otnom numatne kiekeik, so osikene ere kine kine korop sola so wet maep wane n̄āaemamik, yewa mo korop mawarekeik. <sup>14</sup> Nei n̄erewekopze ebunom, en̄e kito qesin̄ oka okan wane kine detlukeu paki, urata maine maikai, paki sola wane qesi qesin̄ zua zuān̄ wakoniake, rokop kito qesin̄ okanbi, miti en̄e welerop okaniake, en̄e gege wele midaine misuk gekei.

<sup>15</sup> Nei n̄rep narop gemami, en̄e koropn̄o “kaiwe maine” rau gen̄ano umaikē. N̄enane

“kaiwe maine” ramaine, yewa kimakopze mali malip korop gemami, eje ebonikene.

Anutu wane Mosopɲo ɲinano korop pawareake.

**Waom Yesu Wane Sigi Maep Don**  
**The New Testament in the Ono Language of Papua**  
**New Guinea**

**Nupela Testamen long tokples Ono long Niugini**

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963